

## **Polas mulleres de Ciudad Juárez**

Os ósos tiñan carne e a carne tiña soños.

Esqueletos a centos buscan nome  
no cavorco do medo para seren  
algo máis que eses números escritos nos papeis.

Os nomes buscan ósos para pousar na morte  
e non ser vagabundas sombras que non regresan.

Polos ósos sen nome, polos nomes sen ósos,  
polo sangue axeado sexa o pranto,  
sexa o berro, o brado e a salmodia ferida.

O monstro é multiforme e bebe na podremia  
e vive no veneno: capital, misoxinia,  
miseria, desarraigo na fronteira do imperio.

O monstro non ten sitio no poema,  
as palabras non han dar acubillo  
á serpe nin aos ovos nin ao sol que os incuba.

Sexa un canto de amor polas obreiras,  
precariedade e mans, porvir de maquiadoras.  
Que sexa unha elexía polos soños roubados:  
pan que levar á boca, pequena casa limpa  
e acaso bicos novos no amencer  
que non chegará nunca.

Ían pola maquía,  
polo prezo das horas de acoso e trato inxusto  
e saúlles ao paso muiñeiro terríbel  
a lles cobrar maquía.

¡Maldita sexa a hora!  
¡Maldito o muiñeiro! Abenzoadas elas,  
a berrar dende nós algo como unha estrela,  
talvez o abecedario dun código perdido.

